

tæ, futurum est; necessario colligitur, visionem Dei claram seu immediatam & intuitivam essentiaæ divinæ, & quæ in ea formaliter sunt, cognitionem, ita reservatam esse vitæ futuræ, ut prorsus non habeat locum in hac vita. Unde porro sequitur, temerarium esse atque irreligiosum, hominibus aliquid in hac vita obtinendum polliceri, quod Deus ipse non in hac vita, sed demum post hanc vitam, impetratum iri, testatus est. Cumque Apostolus se ipsum etiam eorum numero comprehendat, qui non de facie ad faciem, sed per speculum in ænigmate cognoscant: qua fronte fidelibus quibuslibet sublimior in hac vita cognitio Dei tribuitur? Cognitio, inquam, Dei in hac vita, quanta quanta est, intra genus cognitionis *abstractivæ*, quæ intuitivæ contradistinguitur & opponitur, subsistit, juxta Apostolum: tantum abest, ut præter abstractivam, etiam intuitivam complectatur. Neque distinctio inter cognitionem intuitivam *quæ ad tempus*, & eam, quæ *sine fine*, seu incessanter atque æternum concedatur, citra manifestam absurditatem huc accommodari potest: cum Apostolus cognitionem Dei intuitivam non solum non perpetuam, sed prorsus non locum habere in hac vita pronunciet.

XXVI. Æque clara, si non clarior, est sententia S. Johannis, qui *Ep. Cap. III, 3.* scribit: *Charissimi, nunc filii Dei sumus, sed nunc nondum apparuit, quid futuri simus; scimus autem, quod cum apparuerit, similes ei erimus, quoniam videbimus eum, sicuti est.* Videre Deum sicuti est, est Deum intuitive cognoscere. Hoc autem quando *nunc nondum apparuisse* dicit Apostolus, simul dicit, hoc nondum in hac vita cuiquam obtigisse: Ita negat, sibi & quos *charissimos suos* vocat, filiis Dei contigisse. Quod si vero visio intuitiva Dei saltem ad tempus in hac vita concederetur filiis Dei; sane apparuisset hætenus, quid futuri simus, ac futurus ille status ei, quod jam hætenus adfuit, tantum constantiam aut perpetuitatem adderet. Atqui Apostolus rotunde negat, nunc apparuisse, quid futuri simus.

XXVII. Sed Georgius Keirbus affirmativam suam sententiam *tum ex multis scriptura locis, cum ex multorum millium sanctorum*